

**Sikap Cermat Jadikan Tan Sri Mohamed Noah Usahawan Berjaya - Najib
Bernama
20 Jun, 2012**

KUALA LUMPUR, 20 Jun (Bernama) -- Datuk Seri Najib Tun Razak menyifatkan sikap datuknya, Allahyarham Tan Sri Mohamed Noah Omar, yang cukup berjimat cermat telah membantu menjadikannya sebagai usahawan berjaya.

Perdana Menteri berkata dengan sikap itu juga, datuknya dapat menubuhkan Yayasan Mohamed Noah yang telah menyumbang kepada kesejahteraan ramai pihak.

Mengimbuai pengalaman membesar dengan Mohamed Noah, Najib berkata Allahyarham pernah mengingatkan beliau agar tidak membuang botol minuman yang digunakan semasa berkelah kerana ia boleh dikumpul dan dijual semula untuk mendapatkan wang.

"Barangkali sikap cermat itulah yang membawa kepada rezeki. Itu mungkin sebabnya Allahyarham berjaya sebagai seorang usahawan dan dapat wujudkan Yayasan Noah.

"Berkat dari itulah, kami dan ramai lagi telah menerima banyak sumbangan dan kesejahteraan. Berkat dari itulah, kami semua dapat peluang belajar melalui sumbangan Yayasan Noah," katanya ketika berucap pada majlis Malam Jasamu Dikenang - Tan Sri Mohamed Noah Omar di Dewan Merdeka, Pusat Dagangan Dunia Putra (PWTC) di sini

Turut hadir isterinya Datin Seri Rosmah Mansor, Timbalan Perdana Menteri Tan Sri Muhyiddin Yassin, Menteri Dalam Negeri Datuk Seri Hishammuddin Tun Hussein, bekas perdana menteri Tun Dr Mahathir Mohamad dan isteri Tun Siti Hasmah Mohamed Ali.

Majlis itu turut dimeriahkan dengan kehadiran sebilangan besar anggota keluarga Mohamed Noah termasuk anaknya yang juga ibu Najib, Tun Rahah dan ibu Hishammuddin, Tun Suhaila.

Allahyarham Mohamed Noah, yang dilahirkan pada 13 Ogos 1897, merupakan antara tokoh utama yang merintis penubuhan UMNO untuk menentang Malayan Union dan mengembalikan kedaulatan Raja-Raja Melayu.

Pada 1951, beliau dipilih menjadi Pengerusi Tetap Perhimpunan Agung UMNO sehingga akhir 1959.

Selepas itu, Mohamed Noah dilantik menjadi Yang Dipertua Dewan Rakyat mulai 1 Sept 1959 hingga 29 Feb 1964 sebelum dilantik sebagai Yang Dipertua Dewan Negara ketiga dari 24 Feb 1969 hingga 28 Julai 1970.

Beliau meninggal dunia pada 1990 ketika berusia 97 tahun.

Pada majlis itu, Najib turut mengucapkan terima kasih kepada Yayasan Noah kerana menganjurkan majlis yang membolehkan ramai pihak mengenang seorang tokoh yang sangat besar jasa dan sumbangannya kepada kehidupan bangsa Melayu dan seluruh masyarakat Malaysia.

Perdana Menteri turut mengimbau pengalaman lucu bersama Mohamed Noah apabila Allahyarham datuknya itu, yang gemar bermain golf, kerap keluar pada awal pagi untuk membuat 'tee-off.'

"Kami suspect dia embarass dengan game dia, (Kami syaki dia malu dengan permainannya) sebab itu dia mula awal. Satu hari, masa masih samar-sama di waktu pagi, ada orang masuk dalam kawasan golf dan tengok Tan Sri pukul bola dari ladies tee.

"Jadi dia berhenti, buka cermin kereta dan kata `Tan Sri, that is the ladies tee'. Tan Sri balas 'I know, but this is my second shot'," katanya sambil disambut ketawa hadirin.

Najib berkata Mohamed Noah juga mempunyai ingatan yang kuat terutama dalam mengingati peristiwa lampau.

"Salah satu yang dia selalu ulang ialah bila dia di Beirut, Lubnan sehingga dikenali sebagai Haji Mohamed Noah Beirut. Tapi apa yang berlaku di sana tu, saya tak boleh ceritalah," seloroh Najib.

Pada majlis itu, Najib yang mewakili seluruh anggota keluarga Mohamed Noah, turut membacakan sebuah puisi khas buat Allahyarham datuknya sebelum melancarkan buku bergambar 'Tan Sri Mohamed Noah Omar: A Tribute.'

Perdana Menteri turut membaca puisi berbunyi:

"Warkah ini diutus

Dengan penuh hormat dan takzim

Dengan penuh kasih sayang dan

segala rasa kagum

Diutus kepada Allahyarham

Tan Sri Mohamed Noah Omar

Yang telah berpulang ke rahmatullah
dan sedang bersemadi di alam barzakh
Yang semasa hidupnya di dunia fana
Terus menerus menabur bakti dan jasa
Kepada masyarakat dan bangsa
Serta tanah air dan negara Malaysia
Warkah ini ditulis oleh seorang zuriat
kepada seorang leluhur
Diutus dengan penuh tertib dan adab sopan
Sebagai lafaz terima kasih dan rasa syukur
Atas segala jasa dan warisan
Diutus dengan ketinggian tamadun satu bangsa
Menjunjung adab, menjunjung adat, menjunjung ilmu
dan kebijaksanaan menghargai jasa dan perjuangan
Warkah ini diutus untuk mencatatkan
jasa-jasa terpilih dan puncak-puncak kerjaya
seorang anak watan
Yang lahir di Daerah Muar,
Johor Darul Takzim

Yang melalui zaman-zaman remaja

di perantauan

Mengisi dada dan minda dengan iman

dan ilmu pengetahuan

dan kemudian di usia dewasa

jiwa raganya dibakar semangat api perjuangan

memperlopori penubuhan sebuah wadah

Persatuan Kebangsaan Melayu Bersatu - PEKEMBAR

Yang masyhur dengan panggilan Umno

Yang telah berjaya menghancurkan

Rancangan jahat Malayan Union

Yang telah berjaya mengembalikan kedaulatan

Bangsa Melayu dan Baginda-baginda Sultan

Yang telah berjaya melahirkan

sebuah negara baru

Berdaulat dan Merdeka;

Persekutuan Tanah Melayu

Berkembang makmur dan membesar

menjadi Malaysia

Seterusnya pada usia yang semakin matang

Nenda kami Tan Sri Mohd Noah Omar

Berdiri gagah sebagai tiang seri demokrasi

Bersemayam di kerusi

Yang Dipertua Dewan Rakyat

Speaker pertama Parlimen Negara Merdeka yang berdaulat

Adil dan bijaksana, serta petah

Mengawal pada Yang Berhormat berhujah

dan berdebat

Masyhur dengan "sense of honour"

Disegani dan dihormati oleh

semua MP dan YB

Sama ada di pihak kerajaan

atau di sebelah oposisi

Warkah ini diutus untuk merakamkan

satu kekaguman:

Kekaguman terhadap prestasi dan keunggulan pribadi

Seorang tokoh mithali:

Nenda kami Tan Sri Mohd Noah yang dikasihi

Tang memiliki jalur-jalur jalinan watak

yang menakjubkan

Jalinan adat Melayu dengan akidah Islam

Jalinan ilmu yang tinggi dengan

amal yang soleh

Jalinan akal rasional dengan

akhlak yang mulia

Jalinan nilai-nilai tradisi dengan

peralihan zaman

Serta jalinan sikap tegas dan

ehsan kemanusiaan

Jalinan-jalinan yang menakjubkan itu tersulam

Bagai sutera pelangi yang amat cantik dan halus

Menghiasi halaman-halaman sejarah watan

Indah dan mempesona bagai taman firdaus

Jalur-jalur watak yang menakjubkan itu

Kami sanjung dan kami kagumi

Kami jadikan tauladan dan sumber inspirasi

Kami jadikan cabaran dan tanggungjawab

Untuk melanjutkan perjuangan dan khidmat bakti

Demi keperkasaan Bangsa, Agama dan Tanah Air

Warkah ini diutus dengan penuh kesedaran

dan rasa tanggungjawab

sebagai lafaz ikrar serta azam dan hasrat untuk melanjutkan tradisi

berkhidmat dan berbakti

yang telah dirintis dan diwariskan

oleh Nenda Kami Tan Sri Mohd Noah Omar

Jasamu sebagai pemimpin dan pejuang akan tetap dikenang

Nenda telah memberi contoh dan tauladan

Sifat-sifat unggul yang terpuji

Semuanya itu kami terima

sebagai warisan

Sumber inspirasi dan pedoman perjuangan

yang akan kami wariskan pula

kepada generasi sesudah kami

Demi kesinambungan perjuangan Dan khidmat bakti

meneruskan semangat berkhidmat

Untuk kesejahteraan rakyat

dan ketenteraman dunia sejagat."

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=674517>